

kisēyiniw

wanihikēskanāhk ohci ohpimē isi kiskinwahamātowikamikohk
ēkwa nōtinikēwiyinīnāhk isi kānata,
ē-kī-tahkonahk pāskisikan kā-kihci-nōtinitohk.
miswākanak omāhpinēwiniwāwa,
owīcēwakana opakitatāmowiniyiwa
sipwēwāstaniyiwa
kākikē ta-wīsaki-kiskositotahk.
kī-wāpamēw mihcēt omihkomiyiw
kahkiyaw pēyakwan ē-āh-isinākwaniyik
kā-kiyikawipayiyik ēkwa kā-pīhciciwaniyik
asiskīhk isi akāmaskīhk.

kāwi iskonikanihk kā-kī-takohtēt
kīhtwām piko ta-kihci-nōtinikēt.
owiyasiwēwina okimānāhk ohci
kī-wāsakā-kipahikoyiwa otayisiyinīma
otāhk mēnikani-pīwāpiskwēyāpīhk, pakitinikāsowasinahikanihk
ēkwa mīna kistikēwiyiniw otipēyihtamākēwinihk.

kihiwatanīwastotin kī-postiskam,
ē-ohpinahk pimātisiwin kā-kī-kiskēyihtahk,
ē-kiskositotawāt owīcēwākana
ē-nīpawīstamātocik
ē-nōtinikēcik itē kā-nīkāni-nōtinikēhk.
kī-māsihcikēw
ta-pihkohāt otayisiyinīma
ōta askīhk, ‘nīki’ kā-isiyihkātahk.

kī-nahastāw onīmāskwēwina, otōkimāwastotin,
ē-pīhtikwēyapit itē kā-tipiski-kīsowāyik
matotisānihk,
ostikwān ēkwa otēh nīsōhkamākēmakanwa
ēkosi ta-ohtācihāt otayisiyinīma.

otōcikēwina,
otitwēwina,
okiskinwahamākēwina,
isīhcikēwina
kā-kī-āsōnamākoyāhk

āhkami-pimātanwa.

kiskositotāk
aniki kā-kī-kiskēyimikot.
anohc, ēkwa mihcētwāw pāmwayēs
nitōhpinamawāw kākīsimowin ēkwa māmitonēyihcikan
okihcitāw
kā-kī-wīcikāpawīstahk
kisēwātisiwin.

© Louise B. Halfé – Sky Dancer

Poète officielle du Parlement

Traduction : © Jean Okimāsis et Arok Wolvengrey avec Louise B. Halfé – Sky Dancer